


**TEZAU LITURGIC**  
**10 IULIE**

**ACATISTUL**  
**SF. CUVIOS**  
**ANTONIE**  
**DE LA**  
**PECERSKA**



**MOSCOVA, 2000**



# Акафист

## святому преподобному

## Антонию Печерскому

---

### Кондак 1

Избранный угодниче Христов, иноков  
российских первоначальниче и великий  
чудотворче, преподобне отче наш Антоние, с  
любовию приносим ти сия хвалебныя песни,  
небесному предстателю нашему: ты же яко  
имеяй дерзновение ко Господу, молися о  
спасении нас грешных, да зовем ти благодарно:

Радуйся, Антоние, монашескаго в России  
жития первоначальниче.

### Икос 1

---

Ангел во плоти был еси, преподобне отче  
Антоние, аще и на земли родился еси во граде  
Любечи, но вышний град, Иерусалим  
прекрасный, гражданина тя стяжа: обитаеши в  
нем со Ангелы и святыми, и чудес лучами  
озаряеши выну Отечество твое земное, от нас

же чтущих тя услыши похвальное пение  
сицевое:

Радуйся, родителей благочестивых сыне;  
радуйся, града Любеча святое прозябение.

Радуйся, рая Иисусова ветвь многоплодная;  
радуй дела благими Христу благоугодивый.

Радуйся, от младенчества Богом избранный;  
радуйся, от юности Бога всею душою  
возлюбивый.

Радуйся, вся заповеди Господни верно  
сохранивый;

радуйся, в оправданиях Владычних  
непорочно ходивый.

Радуйся, чистое вместилище добродетелей;  
радуйся, красное селение Духа Святаго.

Радуйся, целомудрия рачителю;  
радуйся, смирения любителю.

Радуйся, Антоние, монашескаго в России  
жития первоначальниче.

## Кондак 2

---

Видев Господь душу твою, отче Антоние, пламенем Божественныя любви объятую, в юношеском возрасте научи тя богоугождению истинному, Егоже промыслом наставляем, пещеру в Любечи ископал еси, и в ней в молитвах усердных пребывал еси, подвизаяся сокрушити главу адскаго змия, и победити вся его искушения, да возможеша достойно и праведно воспевати Троидиному Богу ангельскую песнь: Аллилуия.

## Икос 2

---

Разум небесный свыше тебе даровася, преподобне отче Антоние, и в юных летех мудростию старческою процвел еси, вся тленная в уметы вменив, Единому же Богу благоугождати вожделев, чесому свидетель неложен пещера, в юности тобою ископанная в Любечи, для подвигов духовных, яже яко труба всем возвещает, каков подвижник был еси в юности твоей. О сем дивяшеся, вопием ти:

Радуйся, юноше, Богом возлюбленный:

радуйся, отроче, десницею Всевышняго освященный.

Радуйся, пророка Божия Илии, в пещере жившаго, благий подражателю;

радуйся, Крестителя Христова Иоанна, в пустыни обитавшаго, ревностный последователю.

Радуйся, пещерное подвижническое житие усердно возлюбивый,

радуйся, многая благодатная дарования стяжавый.

Радуйся, закон Бога твоего на скрижалях сердца твоего написавый;

радуйся, заповеди Евангелия Христова свет стезям твоим имевый.

Радуйся, Христа премного возлюбивый;

радуйся, непорочно и свято на земли поживый.

Радуйся, мир и вся красная его презревый;

радуйся, о горних благах выну помышлявый.

Радуйся, Антоние, монашескаго в России жития первоначальниче.

### Кондак 3

---

Силою Божию укрепляемый, Отечество твое земное оставил еси, Антоние богомудре, и в жребий Богоматере, Святую Афонскую Гору удалился еси, да тамо обрящеши пристанище тихое ко спасению, и навькнеши иноческому равноангельному житию, егоже возжелел еси, да сподобишия благоприятно славословити Творца всяческих Бога, и пети Ему: Аллилуия.

### Икос 3

---

Имея помысл чист и непорочную душу, отче Антоние, яко овча кроткое, на пажить Богоматерню, во святую Афонскую Гору притекл еси, и к доброму пастырю иноческия обители обратился еси, прося его, да причтет тя к стаду словесных своих овец; тойже провидев в тебе сосуд избран Духу Святому, с любовью тя прия, и во иноческий чин облече. Мы же ублажаем тя звании сими:

Радуйся, иноче боголюбезный;

радуйся, постниче нелицемерный.

Радуйся, воине духовный, не обязавыйся куплями житейскими;

радуйся, куплю небесную совершивый.

Радуйся, Христа бисера драгаго обретьи;  
радуйся, Его ради Отечество земное  
оставивый.

Радуйся, Его ради странник и пришлец на  
земли чуждей бывый;

радуйся, любовьию крепкою с ним на веки  
соединивыйся.

Радуйся, Афонския Горы жителю добрый;  
радуйся, жребия Богоматерняго прозябение  
благодатное.

Радуйся, преподобных отец Афонских  
духовный учениче;

радуйся, богоносных пустынножителей  
Святых Горы неленостный сподвижнике.

Радуйся, Антоние, монашескаго в России  
жития первоначальнике.

#### **Кондак 4**

---

Бури страстей избежав, в пустыни Афонстей  
безстрастия благодатнаго достигл еси,  
преподобне отче Антоние, и духовно возрасл еси  
в мужа совершенна о Христе: темже безмолвия  
крайняго возжелев, с благословения игумена  
твоего, в горе, в пещере вселился еси, и в ней в

молитве и посте безмолвно подвизался еси, вопия немолчно Богу: Аллилуия.

### **Икос 4**

---

Слышав игумен твой глас небесный повелевающ ему, да послет тя, отче Антоние, в страну российскую на подвиги духовныя, призва тя и благослови, да идеши тамо, идеже рожден был еси, и устроиши обитель иноческую на месте, свыше Богом на то предызбраннем. Сего ради тебе зовем:

Радуйся, светильниче Божия благодати на Афоне возженный, и Россию духовно просветивый;

радуйся, яко свет добрых дел твоих немерцаемо светится присно.

Радуйся, заре не вечерняя Солнца Правды Христа;

радуйся, послушания рачителю, непрекословно волю игумена твоего исполнивый.

Радуйся, святое благословение Афонския Горы в наследие российстей стране принесый;

радуйся, в волю Божию всего себе предавый.

Радуйся, мудрый странниче, иский  
Отечества горняго;

радуйся, красныя нозе твои в путь  
спасительный ради многих направивый.

Радуйся, вся дольняя презревый, о горних же  
выну воздыхавый;

радуйся, нищету духовную себе совершенно  
усвоивый.

Радуйся, смирения святого преисполненный;

радуйся, слезами молитвенными себе  
орошавый.

Радуйся, Антоние, монашескаго в России  
жития первоначальниче.

### **Кондак 5**

Боготечней звезде подобен быв, отче  
Антоние, от Афона в Русь притекл еси, и во  
граде Киеве, в пещере варяжстей, вселился еси,  
обиталище разбойников в храм молитвы  
претворив, идеже день и ночь в молитве  
неутомимо подвизался еси, и благоумиленно  
воспевал еси Господу: Аллилуия.

## Икос 5

Видевше тя людие киевстии, Антоние богоносне, яко Ангела Божия, всеми добродетельми украшена и равноангельное житие в пещере провождавшаго, прихождаху к тебе усердно, ови благословения и молитв от тебе ищуще, ови же подвизатися с тобою хотяше; ты же, по глаголу Христову, приходивших к тебе не отгонял еси, но спасению человеческому ревностно служил еси, и основание славней Лавре Печерстей положил еси, яже красуется тобою, яко краеугольным камением своим, и воспеваает ти песни таковыя:

Радуйся, подвижничество духовное в  
российстей стране насадивый;

радуйся, слез твоих теченьми оное во сто  
крат у плодоносивый.

Радуйся, делателю добрый винограда  
Небеснаго;

радуйся, управителю душеспасительный  
вверившихся твоему духовному руководству.

Радуйся, в подземных кровех пространство  
Царствия Небеснаго получивый;

радуйся, к нему бодренно и неуклонно  
ученики твоя путеволивый.

Радуйся, правило веры истинный;  
радуйся, образе кротости духовный.

Радуйся, верховный отче иноков российских;  
радуйся, зеркало светлое всех добродетелей  
иноческих.

Радуйся, о немже радуются Ангелы на небеси;  
радуйся, о немже Бога славят человецы на  
земли.

Радуйся, Антоние, монашеского в России  
жития первоначальниче.

### **Кондак 6**

---

Проповедник смирения святого был еси  
братии твоей пещерней, преподобне отче  
Антоние; смирения бо ради, от игуменства и  
священства уклонился еси, предпочитая поучати  
братию, не толико властью и словом, колико  
примером святоподвижного жития твоего, по  
глаголу Господню всем быв слугою. Темже ныне  
прославляешься со Ангелы, и сладце поеши  
Пресвятей Троице: Аллилуия.

---

## Икос 6

Возсиял еси на горах Киевских яко столп утверждения верных, Антоние богомудре, и яко денница светлая, от мрака пещерного востекл еси на гору Небесную, отнюдуже озаряеши Церковь православнорусскую, в нейже почитаешия по достоянию первоначальником иноческаго жития, и слышиши от верных чад ея пение сицевое:

Радуйся прославивый горы Печерския добродетельми твоими духовными;

радуйся, претворивый пещерное жилище разбойников в храмы Господа Славы.

Радуйся, в подземных кровех главу глубиннаго змия крепко сокрушивый;

радуйся, богомыслием непрестанным еще во плоти небесныя блага созерцавый.

Радуйся, утешения Божественного сподобленный;

радуйся, умиления молитвеннаго преисполненный.

Радуйся, многих чад о Христе стяжавый;

радуйся, подражатели жития твоего святого отечески любивый.

Радуйся, яко семя твое духовное не оскуде в земли россиястей;

радуйся, яко веселишися со чады твоими в обителях райских.

Радуйся, яко плод благокрасный, предивнаго Феодосия духовно возрастил еси;

радуйся, яко с ним вкупе во Славе Небесней пребывая, Бога выну о нас грешных умоляеши.

Радуйся, Антоние, монашескаго в России жития первоначальниче.

### **Кондак 7**

---

Враг спасения человеческого хотя скорбь тебе сотворити, преподобне отче наш Антоние, вооружи гневом на тя великаго князя Киевскаго Изяслава; ты же гневу его место уступая, в область Черниговскую удалился еси, и в горе Болдиной пещеру себе ископав, в ней люботрудно подвизался еси, и тем начало обители Свято-Ильинския тамо положил еси, яже благоговейно чествует ныне твою пещеру, чудесы многими прославленную, о нихже

вернии прославляют Дивнаго во святых Своих Бога, зовуще: Аллилуия.

## Икос 7

Новаго тя Антония Великаго дарова Господь стране российской, преподобне отче; якоже бо той древле всю Церковь вселенскую светом добродетелей и чудес своих просвети, первоначальник всех иноков явлься: тако и ты ныне всю Церковь Русскую подвиги твоими и чудесы духовно облистал еси, и по достоянию первоначальник иноков русских именуешься. Темже зовем ти:

Радуйся, во смирении твоём великих дарований Божиих удостоенный;

радуйся, нищетою духовною богатство небесное стяжавый.

Радуйся, древним пророком Божиим равночестный;

радуйся, прозорливости благодатныя преисполненный.

Радуйся, будущая яко настоящая созерцавый;

радуйся, тайная помышления человеческая прозреваый.

Радуйся, вся искушения духов тмы победоносно отражавый:

радуйся, великую власть на диавола от Господа получивый.

Радуйся, от мучительства демонскаго многия человеки молитвою твоею свободивый;

радуйся, яко исцеления благодатныя от гроба твоего верным подаеши.

Радуйся, победивый враги невидимыя глубоким твоим смирением;

радуйся, низложивый и посрамивый гордыню злобного велиара.

Радуйся, Антоние, монашескаго в России жития первоначальниче.

### **Кондак 8**

---

Странное и вельми безмолвное житие провождал еси, богоносне отче, егда от Чернигова паки в Киев возвратился еси, и от дальния пещеры твоя в Ближнюю преселился еси, юже со ученики твоими ископав, яко рай красный удобрил еси ю подвиги твоими и чудесы, и в ней безмолвно пребывая, умиленно воспевал еси Царю Славы Христу: Аллилуия.

## Икос 8

Весь в Бозе быв богомыслием непрестанным, преподобне отче Антоние, в светлом видении в Цареграде, во Влахернстей церкви, вкупе с преподобным Феодосием, таинственно виден был еси каменоздательми Великия печерския церкви, егда Пресвятая Владычица Богородица посылаше их в Киев сооружати ту церковь и вручаше им Божественную икону Своего Успения. Слышавше таковая превелия чудеса Божия, тебе чудотворцу преславному вопием:

Радуйся, изрядный слуго Пресвятыя Богородицы;

радуйся, присный прославителю Ея милостей и чудес.

Радуйся, обитель славную во имя Ея святое, в России основавый;

радуйся, икону Ея чудотворную от рук Ея дарованную, радостно приявый.

Радуйся, сим образом Ея Божественным обитель твою духовно обогативый;

радуйся, с Нею вкупе молитися за ны ко Господу дерзновение получивый.

Радуйся, верный исполнителю заповедей сына Ея и Бога;

радуйся, преславный совершителю многих великих чудес.

Радуйся, пещерный жителю, всю Россию исполнивший славою твоих подвигов;

радуйся, от темных мест подземных светивый миру равноангельным твоим житием.

Радуйся, безмолвниче дивный, вне житейских сует поживый;

радуйся, затворниче благоумиленный молчаливая уста имевый.

Радуйся, Антоние, монашескаго в России жития первоначальниче.

### **Кондак 9**

---

Всем сердцем Бога возлюбив, отче Антоние, Богом возлюблен был еси, иже послушаше благоутробно твоя молитвы и исполняше милостиво вся твоя прошения. В указание тебе места, идеже имейше создатися Великая печерская церковь, просил еси, преподобне, у Господа: да будет по всей земли роса, а на месте том суша, и паки: да будет по всей земли суша, а на месте том роса; и бысть так по твоему

прошению. Темже радостно воспел еси чудес Богу: Аллилуия.

## Икос 9

---

Витий человеческих похвалы превосходит святоподвижническое житие твое, преподобне отче Антоние: кто бо достойно может восхвалити тя чудотворца преславнаго, огонь с небесе сведшаго молитвою твоею, якоже пророк Илия древле, и огнем тем все хврастие поपालившаго на месте, идеже имеяше создатися Великая печерская церковь, в знамение того, яко велия Божия благодать в ней обитати будет. О сем дивящися, смиренно глаголем:

Радуйся, одушевленная Церковь Бога Живаго бывый.

Радуйся, в храме Триипостаснаго Господа душу твою освятивый.

Радуйся, огнедохновенныя дары Духа Святаго в сердце твое приемый;

радуйся, духоносцем апостолом Христовым единокорный.

Радуйся, низводителю предивный огня с небесе;

радуйся, удостоверяетелю чудотворный Божия благоволения к месту Великия печерския церкви.

Радуйся, адаманте блистающий дарами Божия благодати, и несокрушимый прилоги вражиими;

радуйся, столпе непоколебимый святыя православныя веры.

Радуйся, чудотворче преславный и богоприятный;

радуйся, молитвенниче сильный и скороуслышанный.

Радуйся, руке твои преподобнии со дерзновением многим горе воздевавый;

радуйся, прошения твоя со слезами теплыми Господеви приносивый.

Радуйся, Антоние, монашескаго в России жития первоначальниче.

### **Кондак 10**

---

Спасителя душ наших, Господа Иисуса Христа, видети сподобился еси в видении дивнем, преподобне отче Антоние, и обетования благая от уст Его Божественных услышал еси,

яко верный Его раб и угодник. Молися убо Ему, преподобне да и нас убогих не отринет Он от сладкаго лицезрения Своего, но сподобит нас со святыми выну видеть Лице Его Пресветлое, и пети Ему: Аллилуия.

## Икос 10

---

Царя Небеснаго Христа верный раб и последователь был еси, отче преподобне, и сего ради чудотворения даром от Него обогатился еси. Мы же тебе целebника благодатнаго вeдуще, усердно ныне приходим к святому твоему гробу, и от него цельбы безмездныя душам и телесем нашим приемлюще, благодарственно тебе глаголем:

Радуйся, величием подвигов твоих подобен бывый древним богоносным отцем;

радуйся, глубиною смирения твоего превозшедый твоя сподвижники.

Радуйся, сети вражия, яко паучину, сокрушивый;

радуйся, в Царствие Горнее, яко орел воспаривый.

Радуйся, во след себе многия ученики ко Христу приведый;

радуйся, чада твоя духовная от искушений  
диавольских бодренно хранивый.

Радуйся, ленивыя подвигнувый ко  
исправлению Христоподражательным твоим  
житием;

радуйся, грешныя к покаянию приведый  
твоими богомудрыми словесы.

Радуйся, показателю любвеобильный;

радуйся, увещателю пресладкий.

Радуйся, отче, отцев красото;

радуйся, пастырю добрый тобою собранного  
словеснаго стада.

Радуйся, Антоние, монашескаго в России  
жития первоначальниче.

### **Кондак 11**

---

Пение всеумиленное Господеви приносил еси,  
преподобне отче Антоние, и возлежа на одре  
смертнем, молился еси усердно о обители твоей  
и ученицех; таже прощение и благословение  
твоей братии преподав, с миром почил еси, и  
приложился еси к лику святых и преподобных  
отец, с ними же ныне сладце поеши Христу  
Богу: Аллилуия.

## Икос 11

Светоподательный светильник являешия по смерти, преподобне отче Антоние, из под спуда пещернаго поставленный на версех небесных, и отонуду светлостию чудес просвещаяй Церковь Христову. Просвети, угодниче Божий, и наша мрачныя души светом Христовым, и молитвами твоими помози нам тмы греховныя избежать, лучи благодати Божия в сердца наша приимати и неосужденно пети тебе:

Радуйся, благодатию сияющий светильниче;  
радуйся, зеркало пресветлое иноческаго жития.

Радуйся, вторый Моисее, мысленныя скрижали, добродетели твоя, нам от горы святыя принесый;

радуйся, вертоград духовный на горах Печерских насадивый.

Радуйся, яко розги его от юга и до севера прострошася;

радуйся, яко листвия его присно зеленеют.

Радуйся, оляденевшую в язычестве землю Русскую духовно оплодотворивый;

радуйся, садоделатель добрый в ней бывый.

Радуйся, новосаждения богоугодныя в ней возрастивый;

радуйся, от пещерных затворов в Рай Иисусов цветы многая пересадивый.

Радуйся, Ангеле земный;

радуйся, человеце небесный.

Радуйся, Антоние, монашескаго в России жития первоначальниче.

### **Кондак 12**

---

Благодать Божия хранит священный твой гроб, Антоние, отче наш, огня исхождением и воды излианием от него возбранив хотевшим обрести твоя мощи: ты бо смирен сый, и по смерти не восхотел еси явити мощей твоих миру, сим поучая нас благодатному смирению, да во умилении смиренномудренно поем Богу: Аллилуия.

### **Икос 12**

---

Поюще святоподвижное и равноангельное житие твое, преподобне отче, хвалим, славим и величаем укрепившаго тя Господа, даровавшаго нам в тебе пример святыи и

достоподражательный навсегда. Приими убо, угодниче Христов, от нас смиренных, с любовью сердечною тя почитающих, сия нелестныя похвалы:

Радуйся, Пресвятая Живоначальная Троицы благоволением увенчаный;

радуйся, Пресвятая Владычицы Богородицы милостыми ущедренный.

Радуйся, ангельских воинств содружества сподобленный;

радуйся, блаженства святых удостоенный.

Радуйся, сонаследниче преподобных;

радуйся, постников благодатное удобрение.

Радуйся, пещерножителей славо и похвало;

радуйся, всея страны православно-российския крепкое ограждение.

Радуйся, святые Лавры твоя непостыдное упование;

радуйся, подвижающимся в ней спасения вечнаго ходатаю.

Радуйся, телеса наша безмездно врачуяй прикосновением к честному твоему гробу;

радуйся, души наша возводя к наследию блаженства райского святыми твоими молитвами.

Радуйся, Антоние, монашескаго в России жития первоначальниче.

### **Кондак 13**

---

О великий первоначальниче иноков российских, и преславный чудотворче, преподобне отче наш Антоние! Мы чада твоя духовная, и овцы пажити твоея, сия малыя песни хвалебныя усердно тебе приносяще, молим тя: яви нам отеческую любовь твою, и умоли Господа Бога, избавити нас геенны, и удостоити Царствия Небеснаго, да поем Ему со святыми: Аллилуия.

*Этот кондак читается трижды, затем икос 1 и кондак 1*

### **Молитва**

---

О добрый наш пастырю наставниче, приснопоминаемый иноков российских первоначальниче, преподобне и богоносне отче наш Антоние! Ты горе на небеси пребываеши, мы низу на земли, удалении суще от тебе не толико местом, колико греховною нечистотою

нашею; обаче памятья отеческую любовь твою к людем, ти сродным, припадаем и молимтися с умилением и верою: помози нам, грешным, покаянием очиститися и достойным быти помилования и прощения от Господа и Создателя нашего. Умоли Его благость даровати нам великия и богатыя милости: земли плодоносие, воздуха благорастворение, мир глубок, братолюбие искреннее, благочестие нелицемерное, житейских потреб довольство, и да не во зло обратим благая, даруемая нам от щедротодательныхъ Его десницы, но во славу имени Его святого и во спасение наше. Соблуди, чудотворче святыи, благомошными твоими молитвами российския грады, обитель твою и всю страну православнороссийскую невредимы от всякаго зла, и вся люди, жительствующия в обители твоей и на поклонение в ню приходящия, осени небесным твоим благословением, и в скорбех, бедах и болезнях утешение, избавление и исцеление им подаждь, да благодарно славим, хвалим и величаем прославльшаго тя Господа, чрез тебе дивно благодетельствующаго нам, Безначального Отца, Единороднаго Его Сына и Единосущнаго Его Духа, Троицу Живоначальную и

Нераздельную, и твое святое заступление во  
веки веков. Аминь.

